



TAPAK 8

Navalny busemeri Russia nunger dang longkak aittsü ayongshir

TAPAK 7

VK Singh mapa nungi agintsü asü: Rahul Gandhi

VOL. XVIII NO. 117 (ADOK 117) DIMAPUR

RASEMNÜ (WEDNESDAY) TSÜKLAI (FEBRUARY) 10, 2021

₹ 5.00

CM Rio-i NLA library & training room lapoktsü



February 9, 2021 nü NLA kaketnang lapokba sentong nung Chief Minister Neiphiu Rio den NLA Speaker Sharingain Longkumer aser tangartem külemi agiba noksa angur.

Kohima, February 9 (TYO): Nagaland chief minister Neiphiu Rio-i tanü Nagaland Legislative Assembly (NLA) nung digitized library aser modernized Online Training Room lapoktsüogo.

Assembly Secretariat nung aliba NLA kaketnang nung Debates, Reports, and Periodicals amala kaket aika yua lir. Iba kaketnang nung Integrated Library Management Software - KOHA amshir.

Kaketnang nung CCTV enoka lir aser reprography services o digital scanning agütsür.

"Kaketnang tajung ka aliba ajanga MLA ka dang masü saka Assembly ajunga jenjang tajungba akümtsü akok. Kanga junga shiametetba MLA kati nübortem nem osang tejangja sangoktsütsü aser ibaji democracy ka atema tongtipang lir" ta tanü CM Rio-i kaketnang lapoktsüdag ashi.

Kaketnang tajung ka ajanga shilem tulu agir. Tanü-asüng kaketnangji kaketter benbenba dang masü saka alima atema kishi ka ama lir. MLA tem atema kaketnang tajung ka ayuba ajanga shisatsü aser osangtsüsang aika

angazüktsü, ta paisa ashi.

NLA kaketnang nung tanü-asüng amshiba technology benbenlokba atema NLA speaker nem tenüsang agütsür. Iba ya paperless governance atema mera ka agiba lir, ta CM Rio-isa metetdaksü.

Iba sentong nung Deputy Chief Minister Y. Patton-ia o jembidang, "kaketsang la ya osang angudak ka ama züngshir saka tanü-asüng amshiba internet connectivity dena yangluba kaketsang yagibo mapang tatsüka tsüngda aika angazükter" ta ashi.

Assembly Secretariat-i technology amshia ketdangsübaren nung mapa inyaksü atema mezüng mera agir aser iba kaketsang ya kanga dang tongtipang lir, ta NLA speaker Sharingain Longkumer-ia ashi.

NLA kaketsang nung kaketsang lir aser ano Interim period nungi tenzüker records aika lir, ta paisa ashi.

Tanü State Chaplain Rev T W Yamyap-i kaketsang meshiteta sarasademtsü aser NLA Commissioner & Secretary Dr. P. J. Antony-i anküp tepela o jembi.

Dec 2019 matongdang Wuhan nung Covid virus maliasü: WHO

Wuhan, February 9 (Agencies): Coronavirus ya Chinese lab nungi masü saka shiruru ka dak nungi meimchir dak menaba asütsü ta Mongulbarnü World Health Organization nungi mongin nisung kati ashi.

China kübok Wuhan yimti semdangba sülen WHO food safety & animal diseases expert Peter Ben Embarek-i iba osang metetdaksü.

WHO telok kati Wuhan nung coronavirus poktetba bushiteptsü atema oa among. December 2019 nung iba yimti nung coronavirus agi shirangba mezüng puteta liasü.

Wuhan Institute of Virology-i virus sample aika benbenba aser iba ajanga parnoki lokti nung virus ji belenshi asütsü akok temolung melemi bilemer. Ajisüaka, China-iba ya magizüker aser tangalen

ang poket asütsü akok ta ashir.

"Onoki bushisüngdanga arudang virus ji shiruru ka dak nungi meimchir dak menatep asütsü akok ta bushitetogo. Ajisüaka, laboratory nungi meimchir dak mena ta asüba kuli kecha menguteter" ta Ben Embarek-isa metetdaksü.

"Maneni, coronavirus ya frozen products nungi menatep alitsü akok" ta Embarek-isa ashi.

China-i aiben coronavirus ji cold chain ajanga menatep aser tangalen nungi benenba aruba food packaging nung coronavirus kulitem ngutetogo ta metetdaksüogo.

Wuhan Institute of Virology den linük 10 nungi mongin nisungtem adenba WHO teloki Wuhan nung mozükitem, research institutes, shishilembadak ka aser tanga tesemtem semdangogo.

NLA session nung RIIN mebenoktsü: CM Rio

Kohima, February 9 (TYO): Nagaland State Assembly indang Budget Session 2021-22 nung Naga yimten tebilemtsü, SARFAESI Act aser power sector indang revenue onüktem benoka jembitsü saka RIIN onükbo mebenoktsü.

February 12 nungi 20 tashi 13 buba NLA indang session tenetbuba agitsü. Iba ya NDPP-i People's Democratic Alliance (PDA) sorkar atema budget session pezübuba asütsü. "Tang public-i rongdak nüngdak ajiteta assembly nung Naga yimten tebilemtsü Issue aser Securitisation and Reconstruction of Financial Assets and Enforcement of Securities Interest Act 2002 (SARFAESI) Act of 2002 onüktem benoka lemsateptsü" ta tanü CM Rio-i osangbener dang ashi.

Sorkarisa Power sector atema revenue tajungba kümdaksütsü atema onük benoka olemteptsü, kechiyong iba ya state atema kangasa tongtipang lir, ta paisa ashi.

NLA indang Business Advisory Committee (BAC)-i item onüktem benoka jembitsü telemetba agiogo, ta Rio-isa shisem.

February 18, 2021 nü 2021-2022 atema Budget benoktsü aser ibaji February 20 ji olemteptsü sülen agizüktsü.

Governor shidi: Nagaland balaka kümettsü atema sorkar mapa inyakrtemi social media nung osangtem prokshiba atema

Governor R N Ravi-i Chief Secretary dangi züluba shidi atema osangbenertemi asüngdangdang "sorkar mapa inyaker kati state anema zülura, ozüangi tapet mapa inyaksü" ta CM Rio-i langzü.

RIIN: Nagaland nung civil society teloktem aser kin hohotemi sorkar dang Assembly session nung Register of Indigenous Inhabitants of Nagaland (RIIN) Act yanglutsü atema akhangba atema Rio-i "sorkari iba atema inyakkdar anungji anogo lateta meyutsüi mapa timi inyakkdaksütsü" ta ashi.

"Shingaiya iba session nung mesüra tanga session nung ta mapang latetsütsü makok. Sorkar maparen ya timi inyaksüta ta parnoki angatetsütsü" ta Rio-isa ashi.

RIIN Committee-i report agütsüogo aser Cabinet-i ibaji agizükogo saka mapa küma inyaksü atema mapang agir, ta paisa ashi.

"Onoki Naga sensotem aser taoba North East region nungi Hill tribals balala kümogo kechiyong Bengal Eastern Frontier Regulation Act of 1873 ya Naga nunger atema dang masü saka Eastern Hill tribes ajak atema lir. Külen, state sorkari 1979 sangdong agütsüba nung Kohima district kübok Dimapur sub-division ji tribal belt ka ta shia lir. Item onük ajak ya reprangshimba sülen ang jenjang shitak agütsütetsü" ta Chief Minister-isa metetdaksü.

State sorkar indang sangdong nung Dimapur nung lisopur pungu- Naga, Kuki, Kachari, Garo, Tikhir alir ta shia lir anungji ibaji mezüngdoktetsü, ta Rio-isa ashi.

"India nüjiso mangudang Naga Hills nung non-Naga nunger kar arua ali. Külen, 1963 sülen arurtemia jenjang balaka angutsü kechiyong Nagaland ya Naga nunger atema dang masü saka Indian Union kübok state ka lir. Asenoki ajak kümzüka ayutsüla aser aki pei temeten angutsüla" ta paisa metetdaksü.

NSCN(K-NIKKI): Nikki Sumi-i aniba NSCN(K) teloki yimten olemtep nung adentsü lemtetba state sorkari pelashishia agizüker, ta Rio-isa ashi.

NLA nung Joint Legislators Forum-i Nikki den ajuruteptsü asü masü ta osangbenertemi asüngdangdang "nüngdak dang süra, onoki pa den ajuruteptsü aser sendentem amentsü" ta CM Rio-i langzü.

Union Budget: Alima ajungalen COVID-19 wara ajanga rongsenkettsüng jenjang mejungi kümer liaka Union Budget 2021-22 ya "people's friendly budget" ka lir, ta Rio-isa metetdaksü.

"Asenoki iba ya budget tajungtiba ta meshitetsü saka iba ya nübortem asoshi budget ka lir" ta paisa ashi.

COVID-19 wara ajurua aliba den aluyimertemi farms law 3 anema lungkak aiter saka linüki olemtep ajanga item khuret ajak koktetsü imlar, ta Rio-isa shisem.

COVID-19 Nagaland: Nisung 12,166 nungi 11,840 taneptsü nguogo

Kohima, February 9 (TYO): Mongulbarnü Nagaland nung nisung 6 dak COVID-19 aliba putetogo aser parnok züngsema nisung ajak agi 12,166 kümogo. Külen, nisung 3 taneptsü angu aser tang parnok 88 anepaludar.

"Tanü Kohima nung nisung 6 dak COVID-19 aliba putetogo. Ano, Dimapur nung nisung 3 taneptsü ang" ta Health & family Welfare Minister, S Pangnyu Phom-i ashi.

"Tang tashi nung nisung 11,840 taneptsü nguogo" ta paisa metetdaksü.

"Nagaland nung COVID-19 puteta alir nisung 88 süogo saka parnok 10 bo tanga timtem ajanga asü. COVID-19 aliba puteter nisung 151 tashi tanga state temi ogo," ta Health & Family Welfare Director, Dr Denis Hangsing-ia ashi.

Nagaland nung COVID-19 nungi taneptsü angubaji 97.32% lir,

ta paisa shisem.

District balala nung COVID-19 putetba: Dimapur (6,475), Kohima (3,851), Mon (605), Peren (507), Tuensang (248), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,166 nungi Traced Contacts 5,049, armed forces personnel 4,674, tanga state tem nungi arur 1,870 aser Frontline Workers 573 lir, ta Dr Hangsing-isa ashi.

District balala nung tang anepalurtem: Kohima (65), Dimapur (21) aser Peren (2).

Tang anepalurtem rongnung nisung 3 dak shirangba yimya terara lir saka 85 dakbo shirangba yimya kecha mali, ta paisa ashi.

Taneptsü angurtem: Dimapur (6,320), Kohima (3,722), Mon (594), Peren (504), Tuensang (246), Mokokchung (183), Zunheboto

(139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,27,149 tendangogo. RT-PCR ajanga sample 74,097, TrueNat ajanga sample 37,204 aser Rapid Antigen Test ajanga sample 15,848 tendang" ta Dr Hangsing-isa metetdaksü.

NISUNG 7,587 NEM VACCINE AGÜTSÜOGO:

Mongulbarnü nisung 816 nem Covid vaccine agütsü aser tang tashi nung nisung 7,587 nem vaccine agütsüogo, ta State Immunization Officer, Dr Ritu Thurr-ia metetdaksü.

"Nisung 7,587 rongnung health care workers 6,453 aser frontline workers 1,134 dena lir. Tanü tashi nung vaccine agiba sülen temang nung timtem ajuruba osang kecha mali" ta Dr Thurr-isa ashi.

Dmr nung frontline workers 165 nem Covid vaccine agütsü

Dimapur, February 9 (TYO): February 9, 2021 nungi Dimapur nung Covid vaccine agütsüba tanabuba shilem tenzüker aser tanü frontline workers nem 165 nem agütsüogo.

Tanü Deputy Commissioner Dimapur Rajesh Soundararajan IAS, Commissioner Police Dimapur, Rothihu Tetseo IPS aser District commandant Chishi nungertemi

anir vaccine agi.

Dimapur nung district administration atema Urban Primary Health Center Duncan Basti, Police atema Commissioner Police office aser Home Guards atema Home Guards office nung session site tem lapoka lir.

Maneni, tetsür police ketdangsürtem rongnung OC

Women cell Rose Yanthan-i mezüng vaccine agia liasü.

"Vaccine agiba sülen temang nung timtem adokba osang kecha mali. Frontline workers nem vaccine mezüngbuba dose agütsüba maparen ya March 6, 2021 tashi agitsü," ta Dimapur District Immunization Officer Dr. Rebecca-i ashi.

Tuensang District Planning & Development Board senden menogo



DEC & DPDB Tuensang Vice Chairman, Kumar Ramnikant IAS lenisüba kübok Tuensang District Planning and Development Board pur senden February 09, 2021 nü DC indang Conference Hall nung amenba noksa nung angur.

Dimapur, Tsüklai/February 09 (TYO): Deputy Commissioner aser DPDB Tuensang Vice Chairman, Kumar Ramnikant IAS lenisüba kübok Tuensang District Planning and Development Board pur senden February 09, 2021 nü DC indang Conference Hall nung mena liasü.

Taoba ita iba senden amending PwDs aser Eastern Nagaland Agri & Allied Farmer Association pur society registration atema jembiba tanaben jembishia senden tenzük aser iba atema sorkar dangi yoktsü lemtet.

Iba senden nung Noksen SDO (C) nungi ADC jenjangi ajungkettsü, Tuensang nungi Noksen tashi NST bus service tanaben agütsütsü aser jila

lenmang yangluba mapang All wards union Tuensang Town jaoktsü indang jembi aser iba atema tzi pipe line khen atema belentsü aser shishilempadak aonsotsü ayokertem khen atema dangaleni belentsü indang TTC Administrator Ajit Kumar Verma IAS, ADC Tuensang ajanga süoka jembi.

NHIDCL ajanga NH-202 shilem ka agiba indang Deputy Commissioner aser Vice Chairman, DPDB Longleng, Kumar Ramnikant IAS ajanga metetdaksü aser sentong yanglua mapa inyaksü atema NHIDCL ketdangsürtem den senden amentsü nungdak, ta ashi.

Mapa metitemi inyaka otettsü atema nüburtem nungi amalitep nungdaker, ta Executive Engineer National Highways,

Tuensang ajanga ashi.

Deputy Commissioner ajangasa district nung Medical Department-i anir COVID-19 mozü agütsüba sentongtem indang senden nung metetdaksü aser department balala nungi yariteptsü ajungshia liasü.

Officers Club Tuensang tawabangba kübok Badminton Stadium yanglushiba maparen ya February 25, 2021 nungi tenzüktsü, ta senden nung metetdaksü.

Senden nung Agriculture department aser Tuensang Town Council ajanga schem, sentong, inyakyim, maparen aser ketdangsüba indang power point presentation agütsü. Iba senden nungsa Beti Bachao Beti Padhao Tuensang ajanga table calendar lema liasü.

Mon nung healthcare worker 623 nem COVID-19 mozü agütsüogo

Dimapur, Tsüklai/February 09 (TYO): Mon District nung Covishield mozü agütsüba sentong timi agitsü atema Deputy Commissioner, Mon indang Conference Room nung February 08, 2021 nü Mon District Task Force pur senden mena liasü.

District Immunization Officer, Dr. Shasinle Tep ajanga district nung immunization drive balala agiba indang osangtem iba senden nung lemsatepa liasü. COVID-19 vaccination dak sendakba nung Tep-i, 'Mozü

raksa indokba tsütsü Nagaland ya tamajungtiba lir, anungji mozü meraksatsü mechi mozü agitsüpur peria alidak session site amenoktsüla,' ta ashi.

Vaccination drive ya shilem asem kuma lemsar lir aser mezüing shilem nung healthcare worker 623 nem COVID-19 mozü mezüingbuba dose agütsüogo aser tanabuba dose ya February 17, 2021 nung agütsütsü lir.

Iba mozü agütsüba phase tanabuba ya February 8 nung tenzükogo aser iba mapang

frontline worker ajak nem agütsütsü merangtsü. Phase tasembuba ya nüburtem rongnung arishi küm 50 nung tema alirtem asoshi alitsü.

Phase tasembuba takok ngua agitetsü atema data collection aser nungdakba mera agitsü indang iba senden nung jembia liasü.

Iba senden nung Deputy Commissioner, Mon, Thavaseelan K IAS menden liasü aser senden nung district kübok HoDs aser District Task Force züingsemtem dena liasü.

NSCN/GPRN (Reformation) ajanga Hega benjong salem abener

Dimapur, Tsüklai/February 09 (TYO): NSCN/GPRN (Reformation) ajanga 'Zeliangrong' Naga nunger den Hega benjong salem lemsateper, koba February 10-15 tsüingta Zeliangrong kini amunger, ta MIP sangdong ka ajanga ashi. Iba benjong ya sub-tribe asem - ZEmei,

LIANGmei aser RONGmei - lungjemer amunger.

Zeliang kin atema Hega benjong ya tongtipang lir, koba kiyimba benjong la lir. Tulusang dang tanükba, temoatsü aser teyari meshia iba benjong ya amunger. Iba benjong mapang chia-jema benjongteper. Zeliang nusngertemi iba

benjong ya lanurtem kiyimtsü atema mapang tajungtiba ta züingshir.

Iba benjong ajanga Tsüngremi Zeliang nunger adianu aser adianutsürtem Naga nunger rongnung len anir ka asütsü atema temoatsü agüjang ta sarasademtsür, ta sangdong ajanga ashi.

Mon police nem COVID-19 mozü agütsü tenzükogo



Dimapur, Tsüklai/February 09 (TYO): Mon Police nem Covishield mozü agütsüba sentong ya February 9, 2021 nü Police Baptist Church Mon

Town nung tenzükogo.

Pastor, Mon Police Baptist Church ajanga sarasademir iba sentong ya tenzük liasü.

Iba mozü ya Superintendent

of Police, Mon, Imnalensa Ao, IPS nem mezüing agüja liasü.

Tang tashinung Mon police 199 nem Covishield mezüing dose agütsüogo.

DALT-i Lanusanen Pongener nem tenüngsang agütsür

Dimapur, Tsüklai/February 09 (TYO): Itanagar nung agiba Championship Yacht Club MRF Indian National Rally Championship akokba atema Lanusanen Pongener nem Dimapur Ao Lanur Telungjem (DALT) ajanga tenüngsang agütsür, ta Media Cell, DALT ajanga sangdong ka nung ashi.

MRF ajanga sponsor asüba Team Anumolu züingsem Lanubai iba Championship akokba ya National

Championship tenzükür küm 33 arudang Naga nungeri iba konang ngutetba pa mezüingbuba alitsü.

Pai konang-nüngsang ya Ao kin atema kisüing masü saka Naga nunger ajunga asoshi bener arutsü. Ano maneni DALT ajanga aruya aliba Championship nunga takok tajung angutsü moatsür, koba Hyundai ajanga pa sponsor asütsü lir, ta sangdong ajangasa ashi.

Dimapur police-i gari ayuartem apu

Dimapur, Tsüklai/February 09 (TYO): State balala nung ozüing alema garitem auyar nisung pezü tashi February 08, 2021 nü Dimapur police-i pua liasü. Pua alir nisung pezü ya arishi küm 366 tain Abdul Latif S/o Abdul Malik V/o - Samorali Bazar P/S- Murazar, Dist - Hojai, arishi küm 28 tain Uji Ali S/o-Basu Ali P/S - Uriamghat, Dist-Golaghat, arishi küm 35 tain Nurzal Islam, V/o- Disgori Gaon P/S - Murazar, Dist - Hojai aser arishi küm 33 tan Tovi Chishi V/o - Litsa, Dist - Zunheboto P/A-Diphupar 'A' colony alitsü.

Parnok yagi auyatsü tenük yokba garitem (timba Assam nungi) ya hire atema jembitsü aser driver nem temesepba mozü den meyoktepba soft drink jemdaksür gari ya auyatsü, ta inyaka liasü.

Dhemaji district nungi driver ka süjia aoba tanaben nüji dangi aruba sülen ken o ya Niuland Police nem agütsü aser iba sülen nisung pezü ya apu. Par pezü ya Diphupar, Blue Hill station area, Dhobinalah aser Lengrijan area nung apu. Iba dak sendakba nung parnoki auyaba gari pezü tanaben ngutetogo.

Gorkha Public Panchayat Kohima lokti senden ayonger

Dimapur, Tsüklai/February 09 (TYO): Gorkha Public Panchayat Kohima indang lokti senden ka February 14, 2021 (Deobar) nü GPPK Hall, Chandmari, Kohima nung nikongdang 1:00 ako nungi amentsü, ta Gorkha Public Panchayat Kohima ajanga

sangdong ka nung ashi.

Iba senden nung tongtipang onük balala jembitsü alinung Kohima district kübok Gorkha NGOs, GB, seniors aser züingsemajunga medema arua adentsü mepishia metetdaksür, ta sangdong ajanga ashi.



Assam Rifles temi police den külemi February 07, 2021 nü general area Sematilla, Dimapur nung operation ka agiba mapang NSCN (KN) züingsem ka apu. Iba mapang NSCN (KN) züingsem ket nungi point 22 pistol indang injang 19, Gelatine Explosive stick ana aser sen 34,000 nguteta liasü. Maneni asüingdangyatsü atema pua alisang aser pa ket nungi ngutetba oset ya Sub Urban Police Station, Dimapur nem agütsüogo.

Phek District Task Force on COVID-19 pur senden menogo

Dimapur, Tsüklai/February 09 (TYO): Phek district Task Force on COVID-19 vaccine pur senden ka February 8, 2021 nü Deputy Commissioner, Phek indang Conference Hall nung mena COVID-19 mozü agütsütsü aliba indang onük jembia liasü.

Senden nung Deputy Commissioner, Phek, Razouvolie Dozo ajanga

advocacy program nung temolung agütsütsü indang jembi aser nüburtem dang COVID-19 den raraba mapang iba tashidak nungi jenbua alitsü jeli meratem maneni agitsü ayongzüka liasü.

Iba senden nung department balala nungi sorkar ketdangsürtem, NGOs, arogo tenzükür aser temolungertem dena liasü.



Mongulbarnü Assam finance, health & PWD minister Himanta Biswa Sarma-i Lakhimpur district nung Ranganadi ayong temdanga RCC bridge yanglutsü atema lung azüngtsüdang agiba noksa angur. (Lakhimpur, February 9)

Manipur nung BJP-i aniba sorkari nübortem ashiochtsür: Congress

Imphal, February 9 **(Agencies):** BJP-i aniba Manipur sorkari Naga Peace Accord atema nübortem dang tiyazü nangzüka mashileni anir ta Congress-i tai tonglochtsüogo. Congress party-i dang Naga Peace Accord latettsü atema yariteptsü, ta Manipur PCC president Govindas Konthoujam-i ashi. BJP-i aniba sorkari nübortem tsüngdang aika nangzükogo saka tanü tashi mapa ka danga meinyak lir, ta Govindas-isa ashi. August 15, 2015 tashi nung

BJP-i aniba state sorkari küm aika mekokteti aruba Naga Peace Accord angatetteptsü ta hills aser valley district tem alirtemi imlaa liasü, ta MPCC president-isa shisem. Ajisüaka, state sorkari iba onük atema inyakba ajanga Naga nung temolung yirutsüogo, ta paisa metedaktsü. Naga tebilemtsü ya Congress party dak alaka shingaia tangatettep kati marudaktsüettsü, ta Govindas-isa ashi. Taoba Prime Minister Rajiv Gandhi-i June 30, 1986 nü Mizo

Assam Accord sign asü, ta paisa shisem. Govindas-isa 2016 küm Manipur nung district tasen 7 kümteba atema jembi. Taoba N Biren Singh-i aniba state sorkari district 7 kümteba meyipa agitsü atema United Naga Council (UNC) teyari agi ta Manipur Congress president Govindas-i ashi. Ajisüaka, sorkari iba mapa nung tamakok angu. Kasaji 'Go to Hills' aser 'Go to Village' mission nunga tamakok ajuruogo, ta paisa metedaktsü.

Lanur kati PM Modi anema jembiba atema ken o benok

Agartala, February 9 **(Agencies):** Tripura nung lanur kati social media nung Prime Minister Narendra Modi anema jembiba atema Tripura police-i ken o ka benokogo. BJP Yuba Morcha lennir Amitabh Bhattacharjee-i FIR ka benokba nung ajemdaker police-i Agartala police station nung John Choudhury anema ken o ka benokogo. Choudhury ya Agartala kübok Golchakkar nung alir aser Hombarnü Rajya Sabha nung Prime Minister Modi-i o jembidang pai Facebook nung ashishitep aketba onük kar zülü.

JUBILEE JELI SANGDONG

Tsüngrem temeim salem Guwahati nung lir aor ajak dangi Ao Senso Telongjem Guwahati (ASTG) aser Ao Kaketshir Telongjem Guwahati (AKTG) Platinum Jubilee Planning Committee ajang-a abener. Mezüngbuba nung iba sangdong ajanga nenok ajak den tepela osang ka lemsateper. Nenok Guwahati nung alidang, nenok sempet aser shisatsü tajung agi asen Senso aser Student tenzüker aoba to, taküm (2021) asen ASTG aser AKTG küm 75th ajungba Jubilee amongtsüba lir. Aser iba dak sendakba nung nenok (Alumnae) keja shia dangi tsüngdong arua ajuretepnüa bilem, saka mapang agi mashiba den külemi nenok contact aika makaba ajanga Planning Committee aser Senso tantsü – tambutem (Seniors) 27th Dec. 2020 nung meeting mena Nagaland nung tesem asem: Dimapur, Kohima & Mokokchung nung asen Aor Guwahati nung lir aortem den (Alumni) Jubilee sangdong cum get-together Fellowship ka ka akatsü asoshi lemtet, aser item tesem asem(3) temeket nung alirtem den tongtepratepa achayangtsü (mobilize) asoshi temulung lemteta nisung pongui akümba committee ka ka shimtsür mapatem achayanga inyakdagi, saka ashi ama nütsüng aika asü nung, parnoki akokba tashi agi nenok den tongteprateptsü merangaka ano aika contact number mejangjaba agi tongtepratep mesüteti aküm nung, iba sangdong ajanga alumni ajak dang ya mepeshi-a zülur, oda ne teyari medeni iba Jubilee ya takok mangutsü ta onoki metet nung yimlibilema nai shilem agia ne contact number aser nai metetba nisung kar contact lira item lenirtem nem agütsüdaktsüner.

MOKOKCHUNG AREA:

Dr. Chubasanen, Convener	- 9612432662
Dr. Aoyimsen, Member	- 8132914025
Mr. Imkongchuba, Member	- 9436605461
Mr. C. Wati Walling, Member	- 9436603964
Mr. Putulong, Member	- 7005684958

DIMAPUR AREA:

1. Mr. Alem Pongen, Convener	- 9366330761
2. Mr. Wathy Imsong, Member	- 9615108869
3. Mrs. Sentitola, Member	- 8974993712
4. Mrs. Akala Jamir, Member	- 8794109559
5. Mr. Tiakaba, Member	- 8730092085

KOHIMA AREA:

1. Mr. Limawabang, Convener	- 9612164954	2. Mr. Tongpok Pongener, Member - 9862089869
3. Mr. Chubasenup, Member	- 8132918737	
4. Mr. Alemwabang, Member	- 9436799999	
5. Mr. Burakum, Member	- 9863174444	

Adangji nai yariba nung ano tali tesatempa aser tetongjemba nung tongtepratepa aotsu ali nung nai iba nung shilem agidaktsüner. Kanga pelar.

Sd/- Toshirenba Convener Planning Committee.	Külem Tenzüker	Sd/- Temsüzülü Walling President, ASTG
---	-----------------------	---

Arunachal nung sorkar ketdangsür dak toxicology tests agitsü

Itanagar, February 9 **(Agencies):** Arunachal Pradesh nung ozüng alema mozü achirtem kanga aliba district tem nung sorkar ketdangsürtem dak toxicology tests agitsü. Sorkar mapa inyaker aikati mozü achir ta osang kar angazükba nung ajemdaker Arunachal Pradesh sorkari iba telemteba agi. "Iba onük atema tebilemtsü tulu abener aser mozü achir ketdangsürtem dak ozüng tapet agi merenshitsü" ta Chief Secretary Naresh Kumar-i ashi. Hombarnü State Level Technical Expert Committee (SLTEC) senden ka amendang Kumar-i "Linük nung drug-affected districts

272 rongnung Arunachal Pradesh kübok Namsai, Lohit, Dibang Valley, Upper Siang, Anjaw, Changlang, Tirap aser West Kameng dena lir" ta metedaktsü. School nung tesayur tajungtemi kaketshirtemi drugs aser substance abuse indang sayutsüla, ta paisa ashi. "Iba khuret ya opium mesüra cannabis alu raksatsüba agidangbo mekoktetsü. Secondary aser senior secondary schools nung kaketshirtem dang drug abuse tejangja metedaktsütsüla aser tetsür o panchayat züngsemtemia ozüng alema achiba mozü anema rara nung shilem agitsüla" ta Chief Secretary Naresh Kumar-isa metedaktsü.

Lt Gen Rana Pratap Kalita-i Spear Corps toktsüogo



Lt Gen Rana Pratap Kalita (File photo)

Guwahati, February 9 **(Agencies):** Mongulbarnü Lieutenant General Rana Pratap Kalita-i Spear Corps nung command indang mapa toktsüogo. Assam nung soa intetba Army ketdangsür Kalita-i pai ketdangsüba mapang ajaki yaritepba atema pelaba metedaktsü. February 9, 2020 nü Lieutenant General Kalita-i Spear Corps Commander

Pai Spear Corps toktsür Delhi nung oa ano tongtipang mapa ka inyaktsü. "Spear Corps ajanga North East India nung tensa süngjema ayur. South Arunachal, Nagaland aser Manipur nung internal security maparen ketdangsüa Naga Peace accord atema lenmang yangluogo" ta defence spokesperson Lt Col P Khongsai-i metedaktsü. Lt Gen Kalita ya Northeast nungi ketdangsür ka asübayong iba tesem indang kanga junga meteta lir aser ken o aika bentetogo. Pai defence forces aser civil organizations balala tsüngda tesentaktep tajung yangluogo. Lt Gen Kalita-i ketdangsüba mapang nübortem asoshi mapa jenti inyaktsüogo. Talisa COVID19 wara mapang yimtsüng tia nung aliba tesemtem nung terenlok mapa jenti inyakogo.

Assam süngolu mapa inyakertemi lungkak aittsü

Dibrugarh, February 9 **(Agencies):** Assam Chah Mazdoor Sangha (ACMS)-i February 10 nungi timi lungkak aitba sentongttem agitsü osang metedaktsüogo. Süngolu nung mapa inyakertem taa Rs 167 nungi Rs 351 kümjang ta takhangba agüja parnoki lungkak aittsü. "Süngolu tilala nung mapa inyaker nisung lakh 6 shi lir aser parnok taküm jenjang kanga mejungi lir. Süngolu tila kiburtemi parnok dak nungi tajangzüker agir. Parnok atema taa balaka latetja mali kechiyong sorkari iba onük atema mapa meinyaktsür. Süngolu nung mapa inyakertem indang khuret metetaka, sorkari mapa kecha meinyaktsür" ta ACMS president Paban Singh Ghatowar-i ashi. "Onoki 11 charters demand atema state ajungalen timi lungkak aitba sentongtem ayonga agitsü. Dispur Chalo programme atema sorkari temelaba magütsü, saka onoki telangzüba mangu tashi timi lungkak aitba sentongtem maneni agitsü" ta Ghatowar-isa metedaktsü. "Assam nung Assam Tea Corporation (ATC) indang süngolu 14 lir aser item nung mapa inyaker nisung 25,000 lir saka parnok taküm jenjang kanga majung. ATC gardens nung doctor aser nurse tem mali aser mozü kidang tanü-asüng amshiba osettem mali. Onoki sorkar dang iba atema mapa inyaktsü ayongzüker" ta paisa ashi. Onoki telangzüba mangu tashi February 10 nungi onoki lungkak aittsü, ta ACMS president-isa shisem.



TIR YIMYIM YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 10, 2021

EXPRESS LENMANG

Nagaland tenemtsüing lenmang, talisa Dimapur aser Tizit na tsüingda jajatsüba lenmang ya gari tilatem danga senzütettsüsa lapoktsü asoshi Nagaland FootHill Road Co-Ordination Committee-i anir nübortemi kanga meranga inyakdagi. Aji oda, iba lenmang ya talisa Konyak, Ao, Phom aser Lotha nung asoshi kanga tongtibang lenmang asünungji, Naga kintem ajak dang nungi parnokisa temulung tagütsüba agüja inyakba angur. Ano, Aortemi balaka, arogo nung tenla sen sarua Ao Baptist Arogo Mungdang ajanga sen lakh ishika sarur state government nem agütsüogo. Atangji, alu lenmang tatsüka apir masü saka gari tulu anabo mesüra pezübo kenyongi tsüiteptettsüsa gari lenmang tulu yanglur asünungji, kija kibongi mesüra arogo nung temulung tenla saruteper agütsüba agibo meperitsü saka iba tenla jagi nübortemi lenmang yaktasa lapokdaksünüba tejangraba, taginüba aser teyongyaba tuluka sayur. Iba kasa nüngdakji government nung alirtemi repringteta inyak nungbo küm papika ya apu tatsüka merenemtet yamai mesazüla. Tenla kidang Nagaland Foot Hill Road yanglutsü atema dena tenla sarur saka assembly nungbo shingaia süoki ia benoka mejembir ta mapang mapang shia Coordination Committee purtemi ola adok dang aritepa tilaka inyakli anenli ta Dimapur nung Nagaland state stadium yangluba mapa mesüka foohill lenmang yaa kümdagi. Tenüngbo tulu saka tonga oa repringdangtsüla masü, tenüng o mapa na mesütep, sen endokba o mapa na mesütep, asen lima nung mapa aika inyaksadagi. Item rongnung foothill road yaa ka asütsü. Atangji, Co-ordination Committee purtemi temulung agüja nüngsen agia nungshiba agi dang ashi, state stadium mapa amato Foot Hill lenmang ya meinyaki toktsür lila, saka tang amai mapang mapang shia parnoki rongshiba agi, terongshi marem mapabo maneni tilalabo inyaka aoba angur. Atangji, lenmang meyanglutetaka government-i inyaktetba mapa kaji, state highway mesüra National Highway asütsüba agi Trans Expressway kümtsüogo, anungji tenüng agibo Nagaland FootHill Road ya linük nung gari trok mesüra ti kenyongi tsüiteptettsüsa yangluba lemang tulutibatam rongnung ka asütsü. Ibaji osang tajung lir, saka iba lenmangji meyanglu dang gari tila dena jajattettsüsa lenmang tilaka danga tupoka renemnüba teyongyabaji nübortem mulungjang nung kanga tulu lir. Gari lenmang yanglubatem ya tesem balala nung nüngdak apir lenmang tulu aser tila nem tenüng balala agüja yanglur. Item lemangtem rongnung tulutibaji Expressway ya lir, yabo state ka nungi kati aotsü aser lenmang nung khen nung gari trokbo mesüra tibo tsüiteptettsüsa yanglutsü. Iba kübokji yimti o yimti na tsüingda National Highways aser state highways yanglur. Aji oda, Expressways nung yabo garia speed limit ghonda nung kilometer 120 tashibo aotsüsa anitsü melar aser lenmang nung gari tanga aita meinprong masütsüsa lenjema aika meyanglur. Tang India nung Expressway tajungtibaji Ahmedabad-Vadodara lenmang kilometer 95 lir aser Expressway talangtibaji Agra-Lucknow lenmang kilometer 302 asütsü. Item lenmangtemji kodang bilemdangdir, asenok Foothill lenmanga jangratemtsüka yanglua aotsü nükla nung angur. Ajisüaka, Trans Expressway nungji Nagaland enoka Trans Nagaland Expressway yanglutsü tenzükdir, kecha ashitsü makok, tang state stadium amaji kodanga merenemtetba project-ang ka akümtsüa akok mesüra tang Foothill Road nung Doyang apu tatsüka merenemtet ajokshiba amato iba 21st aso ya tom ka tashi oa ajokshir anentsüa akok. Iba ama, joko, shinga daka temulung melemtettsüsa kümer aliba mapang ka, tanü Nagaland Foothill Road Coordination Committee purtemi government nung ketdangser, contractor aser lokti tentet lenirtem ayongdena mapa repringi aoba jagi nübortem nem teimla tuluka agütsür. Ano, iba ama jajadang nüngdak nung amshitsü atema sannüker kati pai züluba kaket nungi ajangzüktetba sen meyrirjang lir tashi tenla agütsübaaji government nung alirtem asoshi tayongzükbata tulu asütsü. Item tenlatem aser nübortem teyongyaba aser nüngdak ajakji tatartemi tang tatar senden nung süoka jembir küm tasen nungbosa tang tenzükbata mapa yabosa renemtsüsa inyaktsü imlar. Project tulu sen crore aika jenjang yanglua benokbaji junger, saka project tulu tila ta masü saka sentongji mapang shitak nung mapa küma inyaktettsüla. Talangkati maodangyongji, yangi kidanger yimti Guwahati nungbo küm shia flyover azüklen apu talang kaka renemer, saka asenokbo küm tenem nung foothill road tilaka tupoka merenemtetba ya yimsüsürtemi anir nübortem ajak asoshi tamakok asütsü. Joko, asenoka aka-maka ta masü saka pi dang aakba agi, taak marem, kechi mapa tenzükdir tenzükbata, mapang shitak nung mapa shitak renemtsüsa kati ka ajungshitepa inyaktsüsa tangatetba kati aru meshiogo.

OLEMSABANG

TAMANGBA YIMSÜ AJAK DANG NUNGI YISU KHRISTA BALAKA: KECHIBA?

~ Dr. Bendangtemjen, JRTS, Shillong

(Yashi adok nungi...)

4. Temeshi Lai nungi Yisu Khrista balaka ta Tesayuba kar

Engraji nung unique ta asüba ya asen Ao oshi nung balaka, medemdangtsü makokba, memesüktep ta ratetsü akok. Yisu aser pa tesayuba dak amangba aser inyakba telok shirnok dang Khristan ta ajar, parnok kenyongi balaka ta asüba tangaterbakar Temeshi Lai nungi kuli agütsür.

1. Khristan tamangba yimsü nung Yisu Khristaji ajak dang nungi balaka, paji Tebu Tsüngrem aser meimchir tsüingda o tongdar ka. Kechiba süra paji balaka Tebu Tsüngrem shisangdaksütsüba teshimtet taküm ka (1 Tim. 2:5; Ef. 2:13-18).
2. Tsüngrem ka nung asem tesayuba tanga yimsü nung mangur. Saka Khristan tamangba yimsünung Tsüngrem ka nung asem-Tebu, Techir aser Tanela Temeshi - ya Yisu Khrista ajanga tali jangjadaktsür aser ibaji ajanga asenoki Tsüngrem tali jangjaa angatettsü akoker.
3. Yisu Khrista alimai arutsü küm 1500 shi jilia Tejen Lai nung noklang 300 ben tashi shina zülua lir (Isa. 9:6-7; 53:48; Dan. 9:26). Yamaji shina alibatam ajak kata mezüdoki atalok ta otsü zülurtemi kuli asür. Yisu Khristaji Tebu Tsüngrem alima nung jungkai adoka sayaba asünung pa dak alema Tsüngrem angatettsülemang mali; Yisu Khristai Tsüngrem mulungjang aser mapa jungkai adok. Asen taküm nung Khrista samara Tsüngrem asen dang nungi pilaadoktsü. Ibayongjiang tekümtet lemang ka dang ta Laishibai ashibaji Yisu Khrista indang ashir (Yh 14: 6; T. Mapa 4:12; Mat. 11:3; Mark 2:1-12; 8:29). Tanga yimsü tesayurtemi tekümtet lemangji dang sayua toktsüashi, ni nenok den teti alitsü ta azüngashia meshitet. Tebu Tsüngrem shiba ajak madak kibur, OchibaTsüngrem lir, pa dangi Khrista ajanga dang arutettsü akok aser shiri Khrista ajanga pa jak bushir parnoki Tsüngrem anguba dang masü kotak yimli ajangzüksüta Laishibai jangja jangja sayur (Ef. 2:18; Yoh. 14:16-18).
4. Laishibai ashir, aser yamai alitsü, shirisa Kibuba tenüng nung jadiri kümzüksü. Kibuba Yisu Khrista balaka ta asübaji alima nung alir meimchir ajaki pa tenüng nung jaa kümzüksü aser iba tashiji (authority) Tebu Tsüngremi agütsüba lir (Yoh 12:49-50).
6. Alima nung soa intetba ainkar mesüra tamangba yimsü tenteta pa sülen anidaker jenti akümba tanga tamangba yimsü nungji angur. Saka Yisu Khrista shiba yimya balaka nung mashisa aso (virgin birth/Miraculous conception) (Mat 1:18-23), pai pa Tsüngrem nungi aru ta shitet (Yoh. 6:38-40; 8:42), ibayongji pa ajanga dang Tebu Tsüngrem dangi otettsü ta pai azüngashia shitet (Yoh. 14:6).
5. Yamaji süaka taküm ano alitsüta asüba, teti tatem maka tarutsülima tesem ka aliba indang Yisuii shitet, aser aji Kotak. Tatem makai alitsüba teyimla indang Khristan yimsü nung tesayuba lir, (Yoh. 3:16; 14:2-3; Fil. 3:20; 1 Pet. 1:4).
6. Khristan yimsü nung temenen koba Tsüngrem anema lir, iba ya kanga dang reta iba nungi pongitsü indang sayua lir (T. Ken 51:5; Rom 3:23; 5:12). Saka tanga yimsü nung temenengi pei mapaaajanga ta angatetba dak alaka Tsüngrem anema aibelenba ama mezüngshir. Tsüngremi alima odang meim nung meimchir temenen kodaka süaka pai pei ajaso chir agüja alima alangzükbata (Yoh. 3:16). Tekümtet ngur külen taochi, temenen tatok anguba, tatem makaba tepela, yimjung taküm aliba indang Khristan yimsütesayuba lir (Ef. 2:8; Yoh. 3:36; 10:28).
7. Khristan yimsü nung alima temenen nungi pongitsü mechi Yisu Khrista kangki nung asü, arem aser asemnübuba pa shia aru aser tang Tebu tajichilen mener tamangertem asoshi teti sarasademtsür (Ibri 7:25). Ibai Lai tesayuba Khristan tamangba azüngashi zülü (Creeds) nunga jangja jangjaa zülua lir.
8. Yisu Khrista Tsüngrem mesüka liaka, Tsüngrem den saku aliba jenjangji mesükshi-i pei sasa tazüngla kümer alar ama küma, alimai arua kangki nung pa taküm bendanga agütsüsü, oda kangki nung asütsüa tashi angaba ajemalu jakla (Fil. 2:6-11 Yoh 15:13), iba tesümgangtsü taochi aser temeim mapa Khristan yimsü dak alaka tanga yimsü nung mangur.
9. Yisu Khrista taküm nung tatalokba tarensen - tasoba, tenyaba mapa, tasüba, aremba, shia aruba kotaki atuba (Christ-event) aser ano arutsü- amangba ya Khristan ka atema kanga tongtibang aser ibaji pa tamangba tamendakdak. Khrista shia maru asübo Khristan yimsü aser tamangba yimsüajak amajok süla (1Kor. 15:14; Yoh. 11:25). Sür shia aruba (resurrection) takümüji Khristan asoshi Osangtajungji lir. Ibajagi Yisu Khristaji tanga tamangba yimsü lenirtem dang nungi kenyongi balaka ta shisangtsür. Aji dang masü, pa taküm aliba ajanga pa dak amanger shia nem tekümtet taküm agütsür (Yoh. 1:4; 3:36; 5:24; 10:10). Yisu Khrista sür shia aruba temaitsü iba anogoji Temeshi amongnü ta agizüka Tsüngremkülemer. Pa leper tazüng indang kuli tejanga shia lir (Yoh 20:1-18; Luk 24:3,5), koba tanga yimsü tesayurtem indang nung shia mangutsü.
10. Shia arur külen Yisu Khrista tesem balala nung adoka nüburtemi anguba kuli Laishiba nung sayur: Kari dang masü saka nisung 500 tema agi angu (1Kor 15:5 "Kefa dangi aser ter-ana dangi adok"), Pa adokbaji künü atalokba dang masü, mapang balala nung tesem aisü nung adok (40days T. Mapa 1:3). Pai ken dang adoker pilaa oadok masü, saka parnok den mapang agia chia-jema jembia amen. Parnoki pa dak kongshi aser kojai tarak aser tesa nung nü (spear) agi atsüngba tarak ngua süngmang aser atangji ibai Yisu Khrista shiba kangki nung angenlok ta shiteta amang. (Mat. 28: 9-10; Mk 16: 12-18; Luk 24: 13- 53; Yoh 24: 13-51). Yisu Khrista shia arua, asangsang nung nisung telok balala dangi adokbaji, Khristantema pa dak amangbaji amajok nung amanger masü, saka tanaben shia aruba ya Khrista ama asangsang asütsü ta sayutsü atema Pauli ibai zülü.

Otembang

Temalen ashiba Lai kulitem ajanga jangja jangja tuyur, alima nung yimsü jenti liaka, aseni amangba Yisu Khrista ya ajak dang nungi balaka ta jangja-jangaa sayur. Anungji iba ocet azünger ajak dang ya shinür, Yisu Khrista, Pa arutsü küm jenti tejakdang nungi shinba o-tem, mashisa akumba, asoba, aienba, tenyaba mapa balala inyakba, asüba, aremba aser shia aruba item ajak jagi kuli agütsür, aseni amangba Yisu Khrista ya tanga yimsü tsüngremtem dang nungi balaka ta kuli asür.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Sri Lanka nung tongti putiri Easter bombings indang report meshir



December 08, 2020 nü Presidential Commission-i Sri Lanka Tir, Gotabhaya Rajapaksa nem report agütsüba noksa nung angur.

Colombo, February 09 (Agencies): Sri Lanka nung Arogo tongti lenir kati linük Tir, Gotabaya Rajapaksa dang 2019 küm Easter Sunday anogo nung bomb amshia Tenla ki amakba indang Presidential Commission report pa nem agüjang ta mepishia metetdaksüogo.

2019 küm iba lendong nung Khristan timba ser nisung 260 dak tema asü.

Colombo nung Roman Catholic tongti putir, Cardinal Malcolm Ranjith-i shidi ka ajanga Rajapaksa dang iba report pa nem agüjang ta mepishiogo, ta Arogo otongdar, Rev. Camillus Fernando-i metetdaksü.

Judge tem züngsema aliba Presidential Commission indang report ji yimjak nung mesangdong, ajisüaka taoba hopta Independence Day anogomong nung Rajapaksa-i, aibelenertem anema inyaksü atema iba report ji tim ketdangsertem nem agütsüogo, ta metetdakja liasü.

2019 küm April 21 nü pei temang nung bomb alenloker tesem trok nung bomb pokdaksüba ken o nung Islamic State telok pusemba Muslim nunger ana nem tai tonglokja lir. Item lendong nung asürtem rongnung Roman Catholic Arogo ana nungi züngsemtem aser Protestant Arogo nung

Easter Sunday tekülem sentong nung adenertem, iba tesem anasa alirtem aser Colombo nung aliba hotel asem nung bendangertem densema lir.

Iba tatalokba sülen yimtenren nung mangatettep adoka taoba mapang Tir aser Ato kilonser na tsüngda tesendaktep mejungi aküm. Intelligence ajanga lendong atema tekümdangtsü jelia metetdaksür liasü saka sorkari iba lendong menokdangtet, ta tai tonglokja liasü.

December 08, 2020 nü Presidential Commission-i Sri Lanka Tir, Gotabhaya Rajapaksa nem iba report agüja liasü.

BJP lenir kati Kerala nung Anti-Conversion ozüing benoktsü sangdong

February 09, 2021: India kübok ano state ka nung anti-conversion ozüing benoktsü ta BJP lenir kati sangdongogo, ta International Christian Concern (ICC) osang ajanga metetdaksü.

Kerala nung taruba Assembly election nung BJP-i takok ngura state nung anti-conversion ozüing ka benoktsü, ta BJP lenir kati metetdaksü.

Tawa India nung BJP-i yimsüsüba state ana nunga anti-conversion ozüing benokba sülen Khristantem anema inyakba kanga bulua kümogo.

Kerala nung BJP Tir, K. Surendran-i, state nung 'Love Jihad' ya tongtibang onük ka lir, ta metetdaksü. Surendran-isa, Kerala nung BJP sorkar

arura party-i Love Jihad anema anti-conversion ozüing ka benoktsü, ta metetdaksü.

Tawa Uttar Pradesh aser Madhya Pradesh na nunga anti-conversion ozüingtem agizüka liasü. State anaprongla nung BJP-i aniba sorkar lir. Love Jihad aser tamangba yimsü meyipdaksüba mapatem nokdangtsü atema item ozüing benok.

Hindu yimsü alia amangertemi religious freedom nokdangtsü atema Muslim aser Khristantemi Hindu nunger Khristan yimsü dangi meyipdaksür, ta tai tonglokja arur.

Khristantemi Hindu nunger aika mesüzüka Khristan yimsü dangi meyipdaksür, ta tai tongloktsyuyonga iba osangji

tai, kechiyong India nunger nüchiso anguba sülen mezüing 1951 küm nütsüing züngdangba (census) mapang nung India nunger nütsüing shilem 2.3 dang Khristan liasü, iba sülen 2011 küm census nunga Khristan nütsüingji shilem 2.3 dang lir.

Tang India nung anti-conversion ozüing balala benoka aliba state temji Odisha, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh, Madhya Pradesh aser Uttarakhand state tem lir.

Item ozüing nung ajemdaker Khristantem anema inyaker, aser Khristantem aika puogo, ajisüaka tang tashi nungbo item ozüing nung ajemdaker shinga maitsü.

Nigeria nung sorkari Khristan sepaik trok aitsüba sülen tepset

February 09, 2021: January 25, 2021 nü Nigeria sorkari Khristan sepaik trok nem tai tongloktüsü, iba sülen parnok anema ken o angadangba sülen miima tepsetogo, ta International Christian Concern osang ajanga metetdaksü.

Osangbener den jembidang International Society for Civil Liberties & Rule of Law nung Chairman, Emeka Umeagbalasi-i, Muslim nunger colonel kati sepaitem indang hadir ayuba store nungi raraba hadir aika auyaba sülen

Khristan sepaitem nemji tai tongloktüsü, ta metetdaksü.

Umeagbalasi-isa, "Tang aliba sorkari Khristan yimsü anema inyaker aser Igbo tribe anema inyaker. Nigeria ya Somalia aser Rwanda ama kümдар aser sorkari lisopur telok kar pusema inyaker. Security sepaitem rongnungisa süaka Khristan sepaitem anema inyaker," ta metetdaksü.

Sepaitemibo Khristan sepaitemji metepset ta ashir, ajisüaka tanga tashi parnok

kong aliar mashir.

Iba tatalokba sülen Nigeria nung meimchir temeden atema inyakba agency 28-i longjemer sorkar dang nungi telangzüba meshia temepishiba shidi ka agütsüogo.

Alima nung Khristantem timba tepsetba linükji Nigeria lir. Iba linük nung sorkar tongtibang menden timbaka nung Muslim nunger lir, aser parnoki iba linük ya Muslim linük kümdaktsütsü nükjidong nung Khristantem anema inyaker.

ANO GO ABEN TSÜNGREM DEN

Tejangja Tsüngrem temoatsü Filipi 4:19

Laishiba nungi asenoki ajangshia aruba nung inyaktettsübaren nung ibai kanga tongtipang tekong ka lir. Ajaki taküm nüngdaktem ajurur. Ken-ken asen tashidak alia ajurur. Item mapangji aoksatsüba mapang masü mesüra tamakok nem kokdaksütsüba masü. Ibai Tsüngrem Pa mezüingdangtetba rongsen nungi agütsüba mapang lir. Tsüngremi ne nüngdak sen moatsütsü ta nai amanger asü? Na anema aliba? Ne tsürabur? Ner tanürtem? Ne arogo? Laishibai ashir Tsüngremi magütsütettsüsa ne nüngdak mali. Iba tenangzükbba Laishiba nung maneni angur (T.Ken 116: 6; Ibri 4:16; Mathi 6:8; T. Ken 69:33). Nai Tsüngremi talubosa moatsüba majangshi lira, tebilemtsüji kechi? Timtemji Tsüngrem den ali asü? Mesüra Tsüngremi ne nüngdak nung yaritsü renema lir ta nai mamanger?

Tsüngrem chir shirnoki Pa dak amanger ajak asoshi yuja lir. Kodang Tsüngrem dak amangdir na anüng-akonga malitsü. Tia maka Khristan kari Tsüngrem teyari parnok asoshi makara ta bilemer. Parnok chuba chirtem, saka parnoki meshimetsür ama alir. Tsüngremi moatsütsü ta nai marakzüi amanger ta tangar nem ajitetdaksür asü?

Yisu taküm otsü indang TV Show 'The Chosen' TBN nung sayur



February 09, 2021: Yisu densema lir.

Khrista taküm otsü indang TV series 'The Chosen' Hombarnü (February 8) Trinity Broadcasting Network (TBN) nung sayu tenzükgogo; iba series nung episode 8 lir, ta osang ka ajanga metetdaksü.

Osangbenertem den jembidang TBN chairman, Matt Crouch-i, "Onoki iba television series ya TBN nung sayutsü aliba atema pelar. Iba show reprangertemi pei taküm nung Yisu Khrista tesüiba mapang tem dang nungi tang tajungba ajangshitsü," ta metetdakja liasü.

Episode 8 keta aliba first season nung, Yisu Khrista ajuruba sülen taküm nung temelenshi tulu adokba nisungtem indang otsütem ashitsü. Iba show ya season aika alitsü.

TBN indang Instagram post ka ajanga, parnoki nisung tapu balala aika shimogo, aser mezüingbuba season nung-tepuatsü aliba angopur ka sentsüh agi timtemba, temenen tanelai apuba tetsür kati temenen den raraba aser sempet alir accountant ka par kibong aser nüburtemi sendokba

'The Chosen' mezüingbuba season nung Yisu Khristai item nisungtem ajuruba, Pai mezüingbuba sayatenya mapa inyakba aser Pai alima nung temelenshi adokdaksütsü atema Ministry tenzükbba densema lir. Yisu ajangshirtem indang tenük ajanga Pa atangji reprangtetba nung yaritsü.


Osang angazükba agi, 'The Chosen' ya linük 180 nung million 50 ben reprangogo (views) aser tang oshi 70 nung meyipzükdar.

Season one ajanga Movieguide Award nominations ana angu aser Rotten Tomatoes nung score 100 angu. Iba show ya February 8 aonung 9:00 ako nungi tenzü.

Trinity Broadcasting Network-i ashiba agi, "Alima nung Christian television network tulutibaji iba network lir aser iba ya America nung kibongtemi kanga sapua reprangba channel lir.

"TBN ya 1973 küm Paul aser aser Jan Crouch nati tenzü aser global networks 30 ajanga continent ajak ayimjemer," ta ICC osang ajanga metetdaksü.

OLONG PAITEP # 5720



TIPIEN

1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 5719 TELANGZÜBA

TIPIEN :

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsütsü, 6. Azübenshi, 8. Lah,
9. Jangkuk, 12. Akok, 14. Nashi,
16. Sür.



SHIBA METENTSÜTSÜ OCHI, ASER SHIDAKBA NA

- Ochiba** : Alima nung kangdang anünga alibaji ochi ya lir
- Shidakba** : Hai temba na tasaya aji tiyazü.
- Ochiba** : Nai kotasür yamaji anema aposor shidakba aji.
- Shidakba** : Nai ni mezügmeshi tesüno. Ochiba nai matongar.
- Ochiba** : Temba na kangabo tejashiji. Na ya mopongla sünger.
- Shidakba** : Are atanji süti. Nai ni yamai mezügmeshitsü no.
- Ochiba** : Masü temba saka na yakta tenüng menüksü, saka ni masetshitsü.
- Shidakba** : Hai temba ana tamalen yamato raratepyongjia oda anprong leman kar atema longjemti koda?
- Ochib** : Kechi atema longjemnür aji.
- Shidakba** : Ina joko election anasa arur, aser election-i aitsüpur takar kati kü dang kü rongsen ajak nai amshia voters ayongang ta mepishie. Anungji ana külemi sür yariti koda.
- Ochiba** : Kü tangatetba yamaji masü. Kü lemanbo R.C.C talai
- Tangatettsü** : Nisung tsüngdang shidak mesükba leman ka lir, saka tatempangji tasüba lir. Saka OCHIBAI KIN KA AJUNGKETER. Naia koba shimtsü molunger.

Lilir : N. Saku Imsong, Diphupar

TANÜBO NAI LANGZÜANG

Q. Chauri Chaura ya koba State nung lir?

- A. Uttar Pradesh B. Madhya Pradesh
C. Andhra Pradesh D. Arunachal Pradesh

===== (Taruba adok nung onoki langzünsü)

YASHI ADOK TELANGZÜBA : 10

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimym bureau tem nung agüjang.

1. Tenüng :
2. Tasoba anogo :
3. Küm : 4. Class :
5. School :
6. Talidak :
7. Salem osang :

Tepela
Tasoba Anogo



NAI-A YA METETTER MA?

NETFLIX SABANG NUNG SAYUTSÜ ALIBA FILM ASER

SHOW TEM: FEBRUARY 2021

- | | |
|---|--|
| * Crime Scene: The Vanishing at Cecil Hotel (2021) | * Thus Spoke Kishibe Rohan (Season 1) |
| * The Misadventures of Hedi and Cokeman (2021) | * I Care A Lot (2021) |
| * Capitani (Season 1) | * Tribes of Europa (Season 1) |
| * Layla Majnun (2021) | * Classmates Minus (2021) |
| * Middle of Nowhere (2012) | * The Conjuring (2013) |
| * Red Dot (2021) | * The Conjuring 2 (2016) |
| * Squared Love (2021) | * Brian Regan: On The Rocks (2021) |
| * Buried by the Bernards (Season 1) | * Pelé (2021) |
| * Nadiya Bakes (Season 1) | * Canine Intervention (2021) |
| * Hate by Dani Rovira (2021) | * Ginny & Georgia (Season 1) |
| * To All The Boys: Always And Forever (2021) | * Two Sentence Horror Stories (Season 2) |
| * Xico's Journey (2021) | * Geez & Ann (2021) |
| * Monsoon (2019) | * High-Rise Invasion (Season 1) |
| * The Crew (Season 1) | * Bigfoot Family (2020) |
| * Animals on the Loose: A You vs. Wild Movie (2021) | * Captain Fantastic (2016) |
| * Good Girls (Season 3) | * Caught by a Wave (2021) |
| * Behind Her Eyes (Season 1) | * Crazy About Her (2021) |
| * Hello, Me! (Season 1) | * No Escape (2015) |
| * MeatEater (Season 9 Part 2) | * Our Idiot Brother (2011) |

SUDOKU # 5761

	5		4	3				
1		4	8	6			2	
	3					4	8	
4		2		5	8			
5			3	9		4	8	6
6		3			4	2		5
	6		7	2	1			
7	2	9		4	3			
	4		9	8		5		7

TELANGZUBA # 5760

1	7	4	9	6	2	5	3	8
9	6	2	8	3	5	1	7	4
5	8	3	4	1	7	9	6	2
3	1	7	5	2	8	4	9	6
4	5	6	1	7	9	2	8	3
8	2	9	3	4	6	7	5	1
2	3	8	7	5	1	6	4	9
6	4	5	2	9	3	8	1	7
7	9	1	6	8	4	3	2	5

OJANG LUTEP # 5308

- KTLOI :
- UNNG :
- TSNZÜKTEÜ :
- OSHASI :
- PETSEM :
- ALBALA :
- ARAK :
- BUNÜ :
- NGTAJU :
- GDANÜNKER :

OJANG LUTEP TELANGZÜBA # 5307

RONGRONG ADOKDANG ARITEPA AOTSÜ MEBILEMI
KOMA AZÜOKTSÜAR TAMASA JUNGA BILEMANG

TAN HOPTA ATEMA - KOMA SÜLA ?

Q. Arogo nem Tsüngremer mapa inyaktsü asoshi peii ajangzüktetba rongsen nungi 10% tenla agütsüba ama government nema terenlok mapa inyaktsü atema 5% agütsü nunga koma süla ?

Olong 20 shi nung February 12, 2021 tashi nung iba telangzuba ya onok dangi (e-mail - tiriyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiriyim.in) ajanga yokang. Telangzübatemji taruba Honibarnü adoktsütsü.

Afghanistan nung azütokshi tali akümba tebilemtsü kaabilemer: Modi



New Delhi, Tsüklai/February 9 (Agencies): Ato Kilonser Narendra Modi-i, Mongolbarnü Afghanistan nung azütokshi tali akümba tebilemtsü kaa bilemba lemsatepba den tsükchitep anentsü atema teti asoshi telok ajak densemer ceasefire benoktsü asoshi inyakteptsü ayongzük, aser terenlok maparen balala atema India-i takok tashi teyari agütsütsü nangzüka liasü.

Afghan tir Ashraf Ghani den virtual senden ka nung Modi-i, kidanger aser strategic partner ama India aser Afghanistan nati linük ana temeket nung kiralongrar aser

extremism meshi meshia samadaktsüner, ta ashi.

Ato Kilonserisa, kecha tashi agia Afghanistan terenlok aser India den tesendaktep meraksadaktsütettsü, ta ashi.

Afghanistan nung yimjung atema iny daktepbba dak sendakba nung pai, linük yongsü nung telongjemji kanga tongtibang ta ashiba den Afghanistan ajunga longjemer tetsükdaktsütem ajak koktettsü imlaba lemsatep.

"Afghanistan nung azütokshi tali akümba ngua onok tebilemtsü akar.. Onoki linük nung teti asoshi lokti ajak densema ceasefire benoktsü pusemer," ta Ato Kilonseri

ashi.

Kasa mapang nung Ghani-i, India-i Afghanistan terenlok atema teyari agütsüba ya kanga tongtibang lir, ta ashi.

Maneni Mongolbarnü external affairs minister S Jaishankar aser Afghan external affairs minister Mohammed Haneef Atmar na tsüngda Kabul nung Shahtoot tzünokdang yanglutsü atema tenangzüktepbba yangluogo. Ato Kilonser Narendra Modi aser Afghanistan tir Ashraf Ghani na matsüngdang tenati MoU nung sign asü. Iba tzünokdang ajanga Afghan yimtiba Kabul nem tajemtsü tzü agütsütsü.

Afghanistan nung yimjung aser tesunep atema India-i tongtishilem agia arudar aser India-i teyari aser terenlok maparen balala atema USD billion anabo intokogo.

Taoba küm November ita Afghanistan nung global conference ka agiba mapang India-i Afghanistan nung USD million 80 alang nüburtem asoshi project 100 dak tema inyaksütsü sangdongogo.

Kabul nung Shahtoot tzünokdang ya iba developmental package tasenba nung shilem ka lir.

VK Singh mapa nungi agintsü asü: Rahul Gandhi

New Delhi, Tsüklai/February 9 (Agencies): Congress lenir Rahul Gandhi-i Mongolbarnü Union minister VK Singh mapa nungi agintsü khangogo. Line of Actual Control (LAC) nung mangatettep adoker aliba mapang Singh-i jembiba o dak ajemdaker pa agintsü akhang aser ashiba agi, Singh-i India anema China nem teyari agütsür.

"Kechiba BJP minister kati India anema ken o benoktsüsa China nem teyari agütsür? Pa mapa nungi anentsür alitsüla. Pa mapa nungi manentsüba ya India nunger ajunga mezügmeshiba ka lir," ta Gandhi-i tweet asü.

Minister of state for transport and highways aser taoba mapang four-star general Singh-i Deobarnü Madurai nung osangbenertem dang, China den arrtsü khen danga lateta mali ta ashi. Paisa, linük anapronglai arrtsü tejangja lateta maliba

LAC aiben adena inyaksangshiogo, ta ashi.

"Onoki bilemba dak ajemdaker kwiben ozüing raksa aji nenoki memetet. Chines media-ia iba indang mesangdong," ta Singh-i ashiba The Hindu osangkaket ajanga sangdong.

"China-i 10 ben aibelener lira onoki 50 benbosa aibelener alitsü," ta pai ashi.

Iba sülen Chinese foreign ministry-i iba o amer Ladak anüdoklen LAC nung mangatettep adoker aliba dak sendakba nung India aitsü. "Mangatettep adokba teraji iba ya lir," ta China indang foreign ministry otongdar Wang Wenbin-i ashi.

"Onoki India dang China den nangzükteper aliba ama inyaksangshitsü mepeshir aser jenjang tapet agia yimjung nung alitsü merangtsü mepeshir," ta paisa ashi.

(Maneni tapak 9 nung...)

India-i Covid-19 vaccine million 14.5 talila mekazüka ayu

New Delhi, Tsüklai/February 9 (Agencies): India-i Serum Institute of India (SII) nungi AstraZeneca Covid-19 vaccine dose million 10 aser kidang yangluba Bharat Biotech indang vaccine million 4.5 talila mekazükogo, ta company nungi lenirtemi Reuters dang ashi.

India nung August ita tashi nungbo nisung million 300 nem vaccine agütsütsü tenzükba sentong kübok iba vaccine ana ya agüja arudar. Vaccine agütsüba sentong kübok March ita tashi nungbo healthcare aser yakbang nung inyaktertem nungi tenzükter tantür tambur aser tanga tashidak keta alirtem nem vaccine agütsütsü sentong yanglua lir.

Alima nung vaccine

yangluba company tulutiba SII-i, iba sentong asoshi vaccine dose million 11 agütsüogo aser iba ya amshia January 16 nü nungi tenzükter yakbang nung inyaker million 6.3 nem vaccine agütsüogo.

"Vaccine dose million 10 talila mekazükogo," ta SII otongdari ashiba den company-i sen 200 yong sorkar nem vaccine dose million 100 agütsütsü asoshi tenangzüktepbba yanglur aliba nung iba ya shilem ka asütsü, ta ashi.

Bharat Biotech koba Indian Council of Medical Research-i achaayanger, iba company yagi vaccine dose million 5.5 agütsüogo aser Bharat Biotech otongdar kati ashiba agi, ano dose million 4.5 talila ayoktsü.

India indang drug regulator-

i ashiba agi, SII indang Covishield vaccine yagi shilem 72 tashi mapa inyaker aser kasa mapang nung Bharat Biotech-i ashiba agi, Covaxin indang last-stage trial osang March ita angutsü imlar.

Regulator-isa, taruba ita ishika tsüngda Russia indang Sputnik V aser Cadila Healthcare's ZyCov-D vaccines amshitsü atema temelaba agütsütsü imlar.

India nung taoba ghonda 24 tsüngda nisung 9,110 dak tashidak potet aser tang tashidak menar million 10.85 jungogo.

Health ministry-i ashiba agi, taoba anogo 4 tsüngda tashidak agi asürtem 100 tekübok lir aser tang tashi nungi iba tashidak agi nisung 155,000 dak tema süogo.

Uttarakhand: Tasü mang 31 ngutetogo



Uttarakhanda, Chamoli district kübok Raini yimtsüng anasa rüjep anenzüka aluba sülen Dhauli Ganga ayong nung tzüshi aluba ajanga asürtem tasü mang NDRF personal temi agitetba noksa nung angur.

New Delhi, Tsüklai/February 9 (Agencies): Uttarakhand kübok Chamoli district nung Deobarnü tzüshi alua lendong bener arutsüba sülen samara alirtem bushitepba mapang Mongolbarnü State Disaster Response Force (SDRF)-i Alaknanda ayong nungi tasü mang pongu ngutetogo. Tang tashi nung asür 31 jungogo.

Deobarnü tzüshi aluba sülen ki aika aser tzünokdang tongtibang ana raksatsüogo, yimtsü 13 tashi tesendaktep mejungi kümogo aser kinük nung aliba tesemtem den sendaktepba lenmang aser apu tongtibangtem raksatsüogo.

Tzünokdang yanglua aliba mapang Nanda Devi tenem nungi rürjep anenzüka aluba ajanga tzü, long aser awi Rishiganga yong nung nongokba sülen tzüshi tesashi alua lendong tulu atalok. Küm ti sülen state nung tang lendong tuluba atalokogo.

Ketdangsürtemi Hombarnü aonung tashi nung tasü mang 26 nguteter aliba sangdonga liasü. Samara bushia alir nisung 206 rongnung timba tzünokdang ana nung mapa inyaktertem liasü

aser parnok 175 tang tashi monguteti lir.

SDRF otongdar Praveen Alok-i, "Mongolbarnü anüngdang tashi nung tasü mang 31 ngutetogo, kong Mongolbar anepdang ayong nungi tasü mang pongu agitetba densema lir. SDRF team temi ayong aser ayongküm nung tasü mangtem maneni bushidar," ta ashi.

Paisa, NTPC project inyaka aliba tesem kübok km 1.7 talang tunnel nung tongtibangsa tekümzükba maparen inyakdar, kong mapa inyaker 35 sabanger alitsü ta bilemer, ta ashi.

State police police-i maitüsü jangjar alir nisung 185 samar bushiba osang metetdaktsüogo. Item nisungtem rongnung tzünokdang nung mapa inyaker 173 (Uttar Pradesh aser Uttarakhand nungi timba), yimdaklir 12 aser police ana densema lir.

Mongolbarnü chief minister Trivendra Singh Rawat-i yimtsüng 13 semdangogo aser yirur alirtem den army hospital nung ajurutepegogo.

Sorkari tayimtsü ajanga item yimtsüng nung alir nisung 2,500 nem ration aser tanga relief osettem agütsüdar.



Bihar Angh Fagu Chauhan-i tenangzüktepbba sentong agiba sülen Syed Shahnawaz Hussain nem tenüngsang agütsüba noksa nung angur. NDA sorkar cabinet ulushiba nung Syed-a shimokogo.



Mandalay, Myanmar nung longkak aiter kati police tanishir ka matsüngdang naro agütsür temokok agi ali nungi tsükita apudakba noksa nung angur. Ketdangsürtemi longkak maitdaksütsü merangaka mitkar tashi amshia Aung San Suu Kyi'er sorkar atsüngdokba anema Myanmar nung longkak aitba tali tuluba akumer.

Myanmar nung coronavirus tendangba chirep

Naypyitaw, Tsüklai/February 9 (Agencies): Myanmar nung military-i sorkar atsüngba sülen doctor temi anir civil disobedience campaign tenzükba aser linük ajunga nung nüburtemi longkak aitba ajanga linük nung coronavirus tashidak tendangba tajemba küma aoba official testing figures ajanga sayuogo.

Hombarnü aonung tashi nung nisung 1,987 dak dang tashidak tendanger aliba sayuogo, koba December 29 nü nungi tang tashi nung tajemba asütsü. February 1 nü military-i tashiyim agi srokar matsüng tsüngda hopta shia average nung nisung 17,000 dak tashidak tendanga liasü aser tang anogo nung average nung nisung 9,350 dak dang tashidak tendanger.

Hombarnü nisung pezü dak dang tashidak potet, koba January ita tatembangbuba

hopta tashi nung anogo shia average nung nisung 420 dak poteta liasü.

Osang aginüa ashishiba mapang health ministry otongdar kati iba dak sendakba nung kecha telangzüba magütsü. Hombarnü ministry-i health worker tem dang vaccine agütsüba inyakyim nung teyari agütsütsü mepeshia asüngdangogo, koba taoba ita tatemlen tenzük. Parnoki shirangertem timtem temulungdang yur parnok mapai meyipa arutsü mepeshia asüngdangogo, ta ashi. Southeast Asia nung tashidak agi Myanmar daka kanga mejungi kongshiogo. Myanmar nung iba tashidak agi nisung 31,177 süogo aser nisung 141,000 dak tema tashidak potetogo.

Military coup anema Health workers tem yakbangser civil disobedience campaign nung shilem agidar aser election

ajanga shimba lenir Aung San Suu Kyi pua aliba chiyoktsü aser November ita election lar party-i kokogo, ta agizüktsü khanga parnok mapa-i moi longkak aitdaki.

Suu Kyi-i aniba sorkari October ita coronavirus tashidak prokshia aoba nokdangtsü aser tashidak agi asür tajemba kümdaktsütsü nükjidong nung linük ajunga mokdanga ayu, saka iba ajanga rongsenketsüng nung kanga mejungi kongshiogo.

Junta lenir Min Aung Hlaing, shibai Suu Kyi menden atsünger la pua ayu, pai Hombarnü COVID-19 anema rara ya tongtibangtiba kümdaktsütsü ta nangzükba den nüburtem ajak den vaccine agütsütsü nangzük.

Taoba küm election ya ochi meshi akok ta shia army-i sorkar atsüng, ajisüaka electoral commission-i iba taitzüba ya magizük.

Navalny busmeri Russia nunger dang longkak aitsü ayongshir

Moscow, Tsüklai/February 09 (Agencies): Kremlin anemer Alexei Navalny busemer kati pa tepuokdak ayuba anema linük tesem ajunga nung longkak aitsü aliba sentong ka Mongulbarnü metetdaksü aser Russia nunger dang Deobar nikongdang pei kima alua mobile phone torch tsüklaktsü ashi.

Tir Vladimir Putin anema nokdaker tejangja, Navalny apuba mechi tawa nisung meyerijang aika yimtung nung longkak aita arur.

Temelaba magi longkak aitba mechi police temi nisung 11,000 dak tema puogo, koba ozüng alema aser lendong aketba maparen ka lir, ta Kremlin-i aitsür.

Navalny tembar Leonid

Volkov, shiba Russia nung malir, pai ashiba agi, tan hopta tatemlen longkak aitsü sentong tasen yangluba ya kidanger linük, Belarus nung sorkar anemer opposition temi amshiba yimya den mesükteper lir aser longkak aiter ya police nungi pila alitsüla, ta ashi.

Volkov-i Russia nunger yimti tulutem nung alirtem dang nikongdang 1700 GMT (par mapang) ako nung pei kima nokdaker minute 15 mobile phone torch yaloktsüsü ayongzük.

Iba sentong nung tangokba noksatem agi social media süngdaksütsü, ta pai ashi.

"OMON (riot police) malitsü, tetsübu malitsü. Iba minute 15 yagi kecha

memelenshitsü amai lir, saka iba yagi ajak melenshitsü," ta Volkov-i Telegram messenger nung sangdong.

Taoba küm August ita Siberia nung lia miim amshiba sülen Navalny ya Russia-i January ita mezüngbuba arudang apu. Anüolen linüktemi pa dak nerve agent ka amshi ta ashir, saka Kremlin-i magizük.

Senotsü ochishia mamshiba ken o ka nung aija tepuokdak ayutsü obendang agüja aliba nung pai aibelenogo ta court kati aitsü aser February 2 nü tepuokdaki yok.

Iba ken o ya ajanga Russia aser anüolen linük tsüngta mangatetep tali adok aser tenokdangba agütsütsü jembu tenzükshi.

Wuhan nung shiruru dak nungi COVID-19 adokba mongutet

Wuhan, Tsüklai/February 09 (Agencies): Shiruru dak nungi coronavirus poktetba bushitetsü atema World Health Organization (WHO) nungi telok ka China nung arua alirtemi iba virus shiruru dak nungi poktetba mongutet, ta scientist temi Mongulbarnü ashi. Alima nung nisung million 2.3 dak tali takum samatsüba tashidak ya lah dak nungo adoka ano danga shiruru ajanga nisung dak mena südi, ta mongintemi amanger.

Nisung dak nungi iba tashidak menaloka aoba ya tim mesüker lir saka tang tashi iba tashidak poktetba mejangjateter," ta China team nung tekolakba, Liang Wannian-i osangbener dang ashi.

Virus ya meta talangia cold chain osettem nung bener otettsa akok ta asadangteta lir, anungji virus ya dangalen nungi bener aruba ka ta asadangtetsü anasai aor, saka China-i iba theory magizük.

2019 küm December ita ketdangsürtemi iba tashidak mezüng meputet dang Wuhan nung iba tashidak agi shirangba yimya mali, ta pai ashi. 2009 küm nungi Beijing nung amenoka aliba WHO indang office nung küm ana inyaksang WHO foreign expert Ben Embarak-ia kasaji ashi aser December ita mezüng iba tashidak meputetdang Wuhan nung iba tashidak agi kangshia aruba mali, ta ashi.

Sakai iba mission ya linük balala den sendaktepa lir, koba bushisüngdang metenzükdang nüngsen agia kiasü, kechiaser US-i iba tashidak poktetba

indang kanga junga bushisüngdangtsü akhang aser China-i bushisüngdangba maparen nung yimtenren memeyokteptsü shia liasü.

Mongintemi Wuhan semdangba mapang osangbenertem nem tenokdangba magütsü saka parnoki bushitetba ya Twitter aser osangbener den jembiba ajanga ang terara angazük.

Mongintem ya China nung ita ka among, quarantine nung hopta ana ali aser fieldwork nunga kasa inyak. Saka iba virus temai adoker küm ka jungogo.

Küm ka tejakdang iba tashidak kanga sashia putetba tesem, tzüym nungi adokba chiyongtsü balala ayokdak WHO nungi mongintem ya ghonda ka dang ali. Parnok anogo aika pei hotel nung amunger amai liasü, kong China nunger ketdangsür balalai semdanga liasü aser parnok yimti nung senzüba meliasü.

Saka parnoki Wuhan virology institute nung kanga junga research agi, kong parnok ghonda pezü jungnüa indok aser yangji parnoki China indang bad coronavirus tsütsü takotet nübu, Shi Zhengli densema China nunger scientist tem ajurua liasü. Taoba US tir Donald Trump-i coronavirus ya lab ka nungi adoka alima asüng, ta shijen shia arur.

Iba laboratory nung aliba scientist temi alima nung tashidak tamajungtibatem indang research agir, aser item rongnung COVID-19 mesükba bad coronavirus indang strains densema lir.

U.S. Carrier Groups ana SCS nung Exercise agi

Washington, Tsüklai/February 9 (Agencies): U.S. carrier groups anati Mongolbarnü South China Sea nung exercise balala agiogo. Anogo ishika tejakdang US nunger indang raradang amshiba rong ana mangatetep adoker aliba tzüym nung China-i amokbanger aliba asetkong ka adena aoba sülen tang iba jenjang agiogo, aser iba ajanga linük ana tsüngda tesendaktep nung timtem adokogo.

Theodore Roosevelt Carrier Strike Group aser Nimitz Carrier Strike Group-i, assets tem tsüngda interoperability aser command o control capabilities ajungkeksü nükjidong nung exercise aika ayongzüka agiogo, ta U.S. Navy-i ashi. 2020 küm July ita sülen tang mezüngbuba dual carrier operations ka ayongzüka agiogo.

China-i amokbanger aliba Paracel asetkong anasa USS

John S. McCain destroyer süiba atema China-i aitsüba sülen tang iba exercise agiogo. Tzüym nung kecha tenokdangba makai senzusenpong ajungkettsü nükjidong nung iba sentong benoka inyak ta United States-i ashi, koba tir Joe Biden-i office mapa belenzükba sülen ibala mesükba U.S. navy inyakyim mezüngbuba liasü.

China-i iba tesem temeket nung tesem aika parnok meyong ta ashiba den South China Sea militarize asüba aser Malaysia, Philippines asre Vietnam amala kidanger tem amokmerenba United States-i aija arudar.

U.S.-i iba asetkong anasa aser SCS nung parnoki amokbanger aliba tesem süiba atema China mepelar aser US-i asaa mangatetep adoktsü atema maparen balala benoka inyaker ta shiogo.

Sekrunuzu Organic Spices & Agro Producer Company Ltd semzüksüogo



Phek, Tsüklai/February 09, 2021: Mongolbarnü, Runguzu Nasa nung Sekrunuzu Organic Spices and Agro Producer Company Ltd semzüksüba mapang Phek Deputy Commissioner, Razouvolie Dozo aser tangartem külemi tangokba noksa ka yangi angur.

Phek, Tsüklai/February 09, 2021 (TYO): Phek district indang Chozuba Sub Division kübok Runguzu Nasa nung Mongolbarnü, Deputy Commissioner Phek, Razouvolie Dozo-i Sekrunuzu Organic Spices and Agro Producer

Company Ltd semzüksüogo. Iba sentong nung Dozo-i, shishilembadak takhangba peridaktsütsü atema aluyimer tem dang meranga inyaktsü asoshi ajungshia liasü.

Puran Chetri-i okila jembi aser Cizopra Nienu, Chief

Managing Director-i Sekrunuzu Organic Spices and Agro Producer Company Ltd indang tongmelang agi metetdaksü.

Iba sentong nung, Veshosa Keyho menden liasü aser Sevoyi Swuro-i tepela anküp o jembi.

Assam Rifles-i saisapong osettem agütsü

Dimapur, Tsüklai/February 09, 2021 (TYO): HQ IGAR (North) kübok Dimapur Battalion indang Assam Rifles-i Hombarnü (08.02.2021) Western Sumi Sports Association nem saisapong osettem lema agütsü.

Kuhoxu village, Nuiland area nung aruya aliba Football asayamung atema lanurtem tsüngda saisapong

ajungkettsütsü nükjiding nung Assam Rifles-i item oset agütsü.

Item saisapong osettem ya Khushiabil aser Darogajan yimtsüng indang Head GBs matsüngdang Western Sumi Sports Association, President aser Vice President nem agüja liasü.

Aruya aliba asayamung atema teyari agütsüba aser item

tenla ajanga lanurtem ajungmesoba asoshi Association-i Assam Rifles dang pelaba metetdaksüogo.

Sema nunger lanurtem tsüngda saisapong nung temerük mulungsentsü agi aser ochishia asayatsü; aser tim masüba lenmang nungi pila alitsü ajungmesotsü nükla yur Association-i iba Football asayamung ayongzüker.

Flipkart ajanga Poco M3 ayoktsü

New Delhi, Tsüklai/February 09, 2021 (Agencies): Tan ita tetenzüklen, India nung sayaba Poco M3 smartphone ya Flipkart sabang ajanga angutsü. Nüngtugu Poco M2 den tatongtep smartphone - Poco M3 ta storage model ana nung angutsü aser iba phone nung Qualcomm Snapdragon 662 SoC aser triple camera setup inoka yanglutsüogo.

Iba den bendenloksema, Poco M3 nung 6,000mAh battery ka angutsü aser battery yagi 18W fast charging support

asür. Iba smartphone dak sendakba nung telangzüba tajung jenti nguogo.

India nung Poco M3 6GB + 64GB jenjang sen 10,999 aser 6GB + 128GB jenjang sen 11,999 alitsü. Iba smartphone ya Power Black, Cool Blue aser Poco Yellow nung Flipkart ajanga Mongolbar nungi tenzüka yokdar.

Iba dak alia, Flipkart ajanga alirtemi ICICI Bank credit card nung sen 1,000 instant discount angutsü. Iba offer ya EMI transaction den ICICI Bank credit card nunga alitsü.

Feature tsütsü reprangdangra, Poco M3 nung 6.53-inch full-HD+ (1,080x2,340 pixels) display den 90.34 percent screen-to-body ratio dena lir. Iba smartphone ya octa-core Qualcomm Snapdragon 662 SoC den Adreno 610 GPU aser 6GB LPDDR4x RAM den 128GB internal storage ajanga achaayangtsür, koba microSD card slot ka ajanga 512GB tashi atsülanga amshitetsü. Iba smartphone OS ji Android 10-based MIUI out of the box alitsü.



Wokha, Tsüklai/February 09, 2021: Mongolbarnü, Wokha district kübok Nungying yimdak K. Shekiho Phuleshe, Project Director, DRDA Wokha-i RCC bridge ka lapoktsüogo. Iba apu ya MGNREGA 2020-21, RD Block Chukitong kübok yanglua liasü. Iba apu lapokba sentong nung Mhomdamo Shitiri, VDB Secretary Nungying village menden liasü. Sentong temer Shekiho Phuleshe aser tangartem külemi agiba noksa ka yangi angur.

Pelaba Lemsateper

TASOBA:
Jan. 6, 1943

TASÜBA:
Feb. 2, 2021

Onoki kodanga amatsü makokba Ojala asür **Imlitola** (Kangtsüng), iba lima nungi Tsüngremi jar aoba mapang kija, telok aser yimer yimsanger shirnokisa ozü asükho mapang arua rongsen, nübo, shisatsü, sarasadem agi yariogo, nenok ajak dang ozü kinungertemi kanga pelaba iba ocet ajanga lemsateper.

Talisa onoki item dang alakteta pelaba shisemer :

1. Dimapur Ao Baptist Arogo,
2. Kangtsüng Baptist Arogo,
3. Aoyimkum Baptist Arogo,
4. Medemlar Self Help Group, Aoyimkum,
5. Dimapur Kangtsüng Senso Telongjem,
6. Dimapur Kangtsüng Senso Tamang Telongjem,
7. Anaki Senso Telongjem Dimapur,
8. Dimapur Anaki Senso Tamang Telongjem,
9. Teintet Rogo Sarasademsep, Tuli town,
10. Born Again Ministry, Tuli Town.

Takoksang Tsüngremi nenok ajak talubosa moajang ta ozüi sarasademtsür.

~ Temeim Chimur, Semchir aser Kinungertem.



Rajiv Kapoor alima nungi pilaogo

Mumbai, Tsüklai/February 09, 2021 (Agencies): Bollywood actor Rajiv Kapoor arishi küm 58 nung süogo. Osang ajanga angazükba agi, Rajiv temulungjang agi mapa meinyaki akümba sülen, aritepa pa mozüki anir ao. Rajiv Kapoor ya asür Rishi Kapoor aser Randhir Kapoor teno tanubosang lir.

Asür Rishi Kapoor kinungtsü actress Neetu Kapoor-i social media sabang ajanga Rajiv noksa ka den külemi pa asüba osang lemsatep.

Acting tsütsü, 1983 küm Ek Jaan Hain Hum film nung Rajiv-i mezüng shilem agi. Pa tebu Raj Kapoor indang tatembangbuba film Ram Teri Ganga Maili (1985) nung Mandakini nung pai tongti shilem agiogo.

Bollywood nung temeimertemi Rajiv nem Chimpu nüngja agütsü. Rajiv indang nüngtugu film rongnung Aasmaan (1984), Lover Boy (1985), Zabardast (1985) aser Hum To Chale Pardes (1988) dena lir.

1990 küm sayaba Zimmedaar film nung Rajiv-i tesüsa shilem agiogo. Iba sülen, industry nung pai film producer aser Director ama inyakogo.

Küm 28 sülen, Ashutosh Gowariker indang Toolsidas Junior nung, acting tsütsü Rajiv-i tanaben shilem agitsü renemer liasü. Iba film ya December 2020 sangdonga liasü aser sports drama ka alitsü ta film yanglurtemi metetdaksü. Toolsidas Junior nung Sanjay Dutt-ia tongti shilem agiba angutsü.

VK Singh mapa nungi agintsü... (Tapak 7 nungi...)

India-i LAC nung arrtsü tesunep asoshi iba ya adener inyaksangshiba atema China indang People's Liberation Army (PLA) aija aruogo.

Ministry of external affairs (MEA) otongdar Anurag Srivastava-i, taoba mapang mangatettep adoker aliba dak sendakba nung India sorkar tamendakdak lemsatepogo aser ashiba agi, LAC akhümtsübutsula kechiyong arrtsü nung yimjung aser

tamendakdak lir.

Ladak anüdoklen LAC nung China nunger sepaitemi India anema inyakba sülen linük ana tsüngda mangatettep nung lir. Ken o bentettsü asoshi commander jenjang nung linük ana tsüngda tekuben senden menogo. Taoba küm June ita Galwan Valley nung mangatettep adokba sülen India nunger sepai 20 tashi taküm samaogo.

March 9 nungi 2buba Mokokchung Inter ward football tournament asayatsü



Mokokchung, Tsüklai/February 09, 2021: Mongolbarnü, Marepkong ward, Community hall nung press conference agiba sülen, Marepkong Youth Association Ketdangpurtem aser 2buba Mokokchung Inter ward football tournament indang Organizing team külemi tangokba noksa ka yangi angur.

Mokokchung, Tsüklai/February 09, 2021 (TYO): Marepkong Youth Association ajanga "Towards Excellence" omen nung ajemdaker Imkongmeren Sports complex, Mokokchung kübok March 9 nungi March 20, 2021 tashi 2buba Mokokchung Inter ward football asayamung ayongzüksü terenemba lir.

Osangbener den jembiba mapang Organizing committee, Convenor, Bendangnukshi Jamir-i, 2buba Mokokchung Inter ward football tournament ya taoba küm March ita asayatsü renem, saka Covid-19 wara tenokdangba ajanga iba asayamung thitsütsüsa aküm, ta metetdaksü.

"Taküm-a onoki iba asayamung edition tanabuba ayongzüksü asoshi telemtetba agiogo aser iba atema maparen achaayangdar. MDFA Trophy

sülenbo asayamung tulutiba rongnung inter-ward football tournament ya tanabuba lir. Taoba küm (2019) team 15 agi shilem agiogo aser taküm Mokokchung nung ward ajaki (ward 18) shilem agitsü imlar," ta Convenor-i ashi.

Mokokchung nung football asayatsü sempet tajung alir lanurtem ajungkettsütsü nükjidadong nung iba asayamung ayongzüker aser iba District nung alirtem nem maongka ya agütsür. Iba asayamung takok angur telok nem senpet sen 50,000; runner up nem senpet sen 30,000 den Trophy aser certificate agütsütsü renema lir. Iba den külemi, Highest goal scorer, Best Defender, Best goal keeper aser player of the tournament atema nija sempet agütsütsü.

Sorkar ajanga latetta aliba COVID-19 SOP temzüng nung anidaka iba asayamung

ayongzüksü. "Asayamung nung shilem agir team tem ajungmesotsü asoshi, ticket ayokba nungi sen aruba tem parnok den lemsateptsü onok bangjemtepogo," ta convenor-i shisem.

Marepkong Youth Association-ia, iba asayamung temer sülen, Association-i team ajak atema coaching clinic ayongzüksü, kong, shilem agir team shia nungi asayar anana shilem agitetsü akok. Football asayatsü sempet tajung alirtem, Nagaland Coaches Association team ajanga coaching agütsütsü, ta metetdaksüogo.

Iba asayamung atema form angati alitsü aser February 12, 2021 nungi tenzüka Cyber 48, MMC Shopping complex nung angutsü aser team tasen atema registration fee sen 3,000 alitsü. February 28, 2021 tashi Form ajak bendentsü.

Premier League: Leeds-i goal 2-0 agi Palace kokogo

Leeds, Tsüklai/February 09, 2021 (Agencies): Tang asaya aliba Premier League asayamung nung, Hombarnü Leeds United-i Crystal Palace madak goal 2-0 agi takok nguogo. Leeds striker Patrick Bamford-i pa indang goal 100buba meinoktsüdang Jack Harrison-i mezüng goal idakja Yorkshire club-i asaya koktet.

Taküm Leeds tesem nung Leeds United atema iba takok ya mezüng alitsü. Tan season, Leeds-i Elland Road tesem nung asaya takok anguba dang nungibo parnok tesem nung asaya timba tamakok ngua lir aser parnoki asaya 22 nungi point 32 ngua Premier League table nung jenjang 10buba tongtetogo.

Palace, shirnoki taoba asaya ka nung Newcastle United akok, saka Wilfried Zaha

medeni asaya liasü, par telok jenjang 13buba nung point asem agi Leeds tesülen lir.

Iba asaya tenzüker minute 3buba nung Harrison-i mezüng goal idaktsü. Box tema nungi Stuart Dallas teyari ajanga Harrison-i iba goal inoktsü maongka angu. Bamford-ia minute 10 buba nung pa kolak agi tongokja goal ka idaktsütsü merang, saka goal post adena mayidang Palace goalkeeper Vicente Guaita-i ball nokdanga liasü.

Minute 23buba nung centre forward asayar Bamford-i tanaben goal idaktsütsü maongka angu, saka pai goal adena ball ji metsüdok.

Mezüng half matongda Leeds-i goal ka agi talila ser asaya amokbangtsü maongka tajung angu, kong Pascal Struijk kolak agi ball dak tongokja goal

inoktsütsü merang, saka goal post adena tukadokba yong goal 1-0 agi tejakdang ser tembang.

Ajisüaka, tanabuba half tenzüker mapang tatsüka tsüngda Rafinha-i metsülöktsüba goal ka Palace keeper Guaita teka nung ondaker aodang, Bamford-i kanga dang kara Leeds atema goal tanabuba inoktsü.

Arishi küm 27 tain striker Bamford-i club 9 nung asayaago aser pai football asaya tenzüker goal 100 tashi idaktsüba rongnung tan season indang league nung goal 12 dena lir.

Asaya atemtsü minute trok anünga lia, Palace defence tsütsü tashi maitba maongka agia Harrison-i ano gaol ka idaktsütsü maongka angu, saka pai metsüba ball crossbar nungang ondak.

United XI, Manu Brothers aser Dimensions CI CC nungeri takok angu

Dimapur, Tsüklai/February 09, 2021 (TYO): Local Ground Chümoukedima Town kübok "Pursue oneness" omen nung ajemdaker G-Sports-i nungita aser Nagamese Baptist Fellowship (NBF) Sports Ministry Chümoukedima Village ajanga ayongba 1st Champions Trophy T-20 cricket Tournament tanünübuba nung United XI, Manu Brothers aser Dimensions CI CC nungeri pei tata asaya kokogo.

Mezüng asaya nung, United XI-i toss koka field asütsü shim aser over 18.6 nung par teloki Royal Club nem run 108 dang agütsü. United XI-i over 14 nung koktet aser parnok wicket 7 out asü. Abinash nem man of the

match agütsü.

Tanabuba asaya nung, Manu Brothers-i wicket 3 agi Patriotic akok. Patriotic-i over 19 nung run 132 yanglu aser Manu Brothers-i over 16 nung alizüng tongtet. Patriotic-i Brothers pur wicket 7 out sütsü. Labunesh nem man of the match agütsü.

Kasa anogo, asaya tasembuba nung, Dimensions XI CC-i run 165 agi Green Galaxy CC kokogo. Toss koka Dimensions-i batting asütsü shim aser over 20 nung parnoki run 233 yanglutet; aser wicket 5 out süadok. Tanabuba innings nung Green Galaxy-i over 14 nung run 68 dang yanglur asayar ajak out süadok. Aletuo nem man of the match award agütsü.

AO: Nadal o Stefanos na tanabuba round-i iogo

Melbourne, Tsüklai/February 09, 2021 (Agencies): Mongolbarnü, Australian Open tebur kija mezüng asaya nung Spain nung Rafael Nadal-i Laslo madak takok ngua asayamung tanabuba round-i iogo. 21buba Grand Slam title takok angutsü teimla tulu nung shilem agisang, Nadal terberem yirur ali nunga, pa timtem kecha melii mezüng round tepor junga tembangtetogo.

Australian Open tenzüksü aliba anogo ishika tejakdang, Nadal-i pa temang nung timtem aliba metetdaksü aser iba asayamung atema temang anepalua anisüngzüksü mechi, taoba hopta ATP Cup nung world no. 2 Nadal-i shilem magii.

Ajisüaka, Mongolbarnü Rod Laver Arena kübok tsüngsang mopung agia moa, tebur kija mezüng round asaya nung Nadal-i Serbia nung Laslo Djere madak 6-3, 6-4, 6-1 agi takok nguogo.

"Anogo 15 tashi ni kanga timtema aruogo," ta Nadal-i ashi.

Tesüiba anogo 12 tejakdang, Adelaide nung exhibition asaya ka nung Dominic Thiem den asayaba mapang Nadal terberem nung timtem adoka liasü. Taküm, iba exhibition asaya nung Nadal-i shilem agiba dak alaka tanga tennis tetoktepba ka nungadanga shilem magi arur, Mongolbarnü Australian Open asayamung lapokba mezüng round nung pai asayar alitsü.

"Tanü iba asaya akoktsü kanga nüngdaka aküm aser bilemba ama ni inyaktetogo. Mezüng round ajangtetba atema ni pelar aser tanü ni junga asaya ama bilemer, straight set akoktsü ni temulung nung yur asaya," ta Nadal-i ashi.

Taoba küm November 21 nü London nung ATP Finals indang semi-final nung asayaba sülen, tan tetoktepba asayamung nung Nadal-i mezüng shilem agir alitsü.

Iba asaya tanabuba set nung Djere den tera toktepa masayadang, mezüng set nung Nadal 3-0 agi Djere tejakdang kuma iba set koktet. Set tanabuba nung Nadal-i break point asem tashi angu.

2009 küm Australian Open tebur kija final takok angusang Nadal, shiba taoba mapang nungi terberem nung timtem ajanga kangshia arudar, pai Roger Federer indang Grand Slam title ajatetsü temulungtetba nung shilem agidar. Asayar anapronglai Grand Slam title 20 ben koka lir.

Ajisüaka, clay court nung asayar takoktet Nadal-i Melbourne indang hardcourt nung bilemba ama junga masayatei arudar. Melbourne nung pai pungoben tashi final asayaago, saka khen ang kokdanga lir aser taoba küm quarter final nung Dominic Thiem-i pa tsükdaksü.

Tanabuba round nung Nadal-i Serbia nung Viktor Troicki mesüra qualifier Michael Mmoh den asayatsü aser tan asayamung quarter final nung Nadal-i Greek nung asayar tasen aser seed pungobuba Stefanos Tsitsipas den tokteptsü imlar.

Kasa asayamung tebur kija asaya mezüng round tanga ka nung, Stefanos Tsitsipas-i asayar tejen - France nung Gilles Simon madak 6-1 6-2 6-1 agi takok nguogo. Rod Laver Arena nung, 2019 Melbourne Park semi-finalist Stefanos timtem kecha melii, pai arishi küm 36 tain aser World no.66 Simon akok.

Iba asayamung nung, taoba mapang world no. 6 Simon den Stefanos-i mezüng asaya liasü, kong mezüng set nung Tsitsipas-i Simon indang serve anaben tashi nung point angu aser iba sülen tanüingba set nunga asemben tashi ngua tanabuba round-i ayong ayonga iogo.

"Tanü asaya yamai ayong ayonga akoktsü ta ni imlaa meliasü. Ni kanga süngmanger. Iba asaya tajung liasü, asaya tenzükli nungi tatem tashi bilemba ama ni junga asayaago," ta Tsitsipas-i ashi.

Greek nung Stefanos-i tanabuba round nung Australia nung wildcard Thanasi Kokkinakis den asayatsü terenemba lir. Kasa anogo tebur kija asaya tanga ka nung Thanasi-i South Korea nung Kwon Soon-woo madak 6-4 6-1 6-1 agi takok nguogo.

BILEMDANGANG

"Nisung tajung den medemra
tajung akümstsü angazüker."